

Allannguutissatut siunnersuut

uunga

**Inissianik attartortitsisarneq pillugu Inatsisartut peqqussutaata
allangortinneqarnissaa pillugu inatsisartut peqqussutissaannut nr. x, xx 2008-
meersumut siunnersuut**

Pingajussaanneerinissamut atatillugu Naalakkersuisunit saqqummiunneqartoq.

§ 1-imut

1. § 74, imm. 6, imatut oqaasertalerneqarpoq:

"Attartortut uku akilersuinissamut pisinnaatitaaffeqassanngillat:

- 1) Ukiut pingasut kingulliit iluanni attartorfigisimasaminni ineqarnermut aningaasartuutitut akilersukkanullu ingerlaavartunut akiliinngitsoortarnermikkut sumiginnaasimasut.
- 2) Akilersukkanik ingerlatsereersut.
- 3) Pisortanit ikiorserneqarnissamut pisinnaatitaaffeqartut, tassunga pisortanit ikiorsiisssutit pillugit Inatsisartut peqqussutaat nr. 15, 20. november 2006-imeersoq tunngavigineqartunut ilaalluni.
- 4) Aningaasaqarnikkut akisussaassuseqanngitsumik iliuuseqarnerup kingunerisaanik imaluunniit allatut nammineq pisuussutigisamik akilerneqanngitsunik akiitsoqalersimasut."

Allannguutissatut siunnersuummut nassuiaatit

Nassuiaatit nalinginnaasut

Peqqussutissatut siunnersuummut allannguutissatut siunnersuutip saqqummiunneqarnerani, Inatsisartut Attaveqaqatigiinermut Ineqarnermullu Ataatsimiititaliaata inissianik attartortitsisarneq pillugu Inatsisartut peqqussutaata allangortinneqarnissaanut Inatsisartut peqqussutissatut siunnersuummut isumaliutissiissummini oqaaseqaatai innersuussutaalu tunngavigineqarput.

Siunnersuut siullermeerneqartussanngorlugu saqqummiunneqartoq attartortut amerlangaatsiartut akilersuisinnaanerannut aalajangersakkanik imaqarpoq. [issuaaneq aallartippoq] " Aallarniutigalugu ataatsimiititaliaq isumaqarpoq, aalajangersakkat oqariartaatsimik "aningaasatigut inissisimanerup allanngornera"-

nik ataqatigiisitsisumik killiliisumillu allataqarsimagunanginnerup nassatarisinnaagaa, attartortut arlaqaqisut pisortani attartortitsisuni akilersuinissamut aaqqissuussinermut ilanngussinnaasutut isigineqalersinnaasut, "aningsaatigut inissisimanerup allanngornera" siumut naatsorsuutigineqarsimanngitsoq tassanngaannarlu pilersoq innersuussutigalugu. Peqqussutissatut siunnersuummi § 1, imm. 6, akilersuinissamut aaqqissuussinermik atuilersinnaanermut tunngasutigut marlunnik killiliisuusunik imaqarpoq:

Akilersuinissamik isumaqatigiissusiorsinnaatitaaneq attartortunut, ukiut pingasut kingulliit ingerlanerini attartugarisimasaminni ineqarnermut aningsaartuutininut ingerlaavartunut akilersugassanulluunniit akiliinngitsoortarnermikkut sumiginnaasimasunut atuutissanngilaq. Taamatuttaaq akilersuinissamik isumaqatigiissusiorsinnaatitaaneq attartortunut akilersukkanik ingerlatsereersunut atuutissanngilaq.

Taamaalilluni inatsisissap oqaasertalernerani attartortut, inuttut atukkat nammineq pisuussutiginngisat patsisigalugit ajornartoortut aammalu attartortut akisussaassuseqanngitsumik aningsaasaqarnermik ingerlatsinermik nassatarisaanik akiligassaqaalersut akornanni assigiinngisitsisuusumik killiliinermik allaqqasoqanngilaq. Taamaattumik aalajangersagaq ataatsimiititaliamit ima paasineqarsinnaavoq, aallaavittut isigalugu attartortut taakku assigiinngitsut marluusut akilersuinissamik isumaqatigiissusiornissamut pisinnaatitaassasut, aalajangersakkani § 1, imm. 6 naammassineqarsimappat. Aalajangersakkap oqaasertalernerqarnera taanna maanna periusaasumut, februar 2002-miit atuutilersumut sanilliulluni assut sakkortuujusoq ataatsimiititaliamit isigineqartariaqarpoq." [issuaaneq naavoq]

Ataatsimiititaliap aamma ilaatigut pisortanit ikiorsiissutit pillugit Inatsisartut peqqussutaanni nr. 15-imi, 20. november 2006-imeersumi § 7 aamma § 8 erseqqissaatigaa, taakkunanilu isumaginninnikkut pisimasut nassuiaatigineqarput. Taamatuttaaq inatsimmi pisunut, qinnuteqartup piumasagaatit sukumiisumik aalajangersarneqartut naammassisimappagit innuttaasup ikiorserneqarnissaanut pisinnaatitaaffiliisunut killissarititaasunik aalajangersaasoqarpoq. Tassalu Inatsisartut peqqussutaanni aamma ineqarnermut akiliutinut naammaginartunik annertussusilinnut ikiorsiinissamut periarfissiisoqarpoq.

Aamma kommunini ullumikkut Inatsisartut peqqussutaat naapertorlugu innuttaasut isumaginninnikkut pisunik nalaataqartut, taamaalillutillu aningsaartuutissaminnut nalinginnaasunut akiliisinnaajunnaartut siunnerfigalugit isumaginninnikkut upalungaarsimasoqartoq Ataatsimiititaliamit maluginiarneqarpoq. Ataatsimiititaliaq allappoq: [Issuaaneq aallartippoq] "*Taamaalillutik innuttaasut akiligassatigut pisussaaffimminnik naammassinnissinnaanngikkaangata kommunit aningsaartuutininik annaasaqaataasinnaasunillu ullumikkut akiliisarput. Inatsisissatut siunnersuut akuersissutigineqassappat ineqarfinnut immikkoortortaq aningsaasaqarnikkut ingerlasinnaajunnaaraluarpat akilersuinikkut aaqqissuussinermi allaffissornermut aningsaartuutit aningsaasaqarnikkullu annaasaqaratarsinnaaneq Namminersornerullutik Oqartussat*

inissiaatileqatigiiffiata INI A/S-ip tunngaviatigut isumagilissavai. [issuaaneq naavoq]

Ataatsimiititaliap isumaqatigiittup siunnersuutip ataatsimiititaliamit misissorneqarnera tunngavigalugu peqqussutissatut siunnersuutip naleqqussarneqarnissaa pisariaqartippaa, taamaalilluni attartortut akilersuisinnaatitaasussat killileqqinneqarsinnaassallutik.

Ataatsimiititaliap oqaaseqaatai Naalackersuisunit tamakkiisumik taperserneqarsinnaapput, tamatumunngalu atatillugu inissianik attartortitsisarneq pillugu Inatsisartut peqqussutaata allanngortinneqarnissaa pillugu siunnersuut manna saqqummiuppaat.

Allannguutissatut siunnersuutip inatsisitut teknikkimut tunngasortai misissuiffiqineqareerput.

Peqqussutissatut siunnersuutip allaffissornermut sunniutissai.

Allannguutissatut siunnersuut peqqussutissatut siunnersuummut naleqqiullugu allaffissornikkut nammagassanik amerlanerusunik kinguneqassanngilaq.

Peqqussutissatut siunnersuutip aningaasaqarnermut sunniutissai.

Allannguutissatut siunnersuummi attartortut akilersuisinnaatitaasussat ikilisinneqarmata, allannguutissatut siunnersuutip atuutilerneratigut akilersuinissamut isumaqatigiissutinik sumiginnaanerup kingunerisaanik aningaasaqarnikkut annaasassat killilersimaarneqarsinnaanissaat ilimagineqarsinnaavoq.

Peqqussutissatut siunnersuummi aalajangersakkanut ataasiakkaanut nassuiaatit

Nr. 1-imut

Aalajangersakkap atuuffissaa peqqussutissatut siunnersuutaqqaartumut naleqqiullugu annertuumik annikillineqarpoq. Piumasaqaatit ataasiakkaat annikillisinneqarput siunissamullu sunniutissai annertusiartortussaallutik. Taamaattumik attartortut itigartitaanissaannut piumasaqaatini ataasiinnarmik naammassinnissimanissaat naammassaaq.

1-imut

Attartortut ukiut kingulliit pingasut ingerlaneranni attartukkaminut allanut anisitaanermik kinguneqartumik sumiginnaasimasut, imaluunniit inissiap attartukkap

maanna attartugaanera imaluunniit siornatigut attartugaasimanera apeqqutaatinnagu akilersukkanik akiliinngitsoortarsimasut nutaamik akilersuinissamik neqeroorfigineqarsinnaanngillat. Tamannattaaq attartortoq maannakkut attartukkaminut sumiginnaasimappat, taanna atuutissaaq.

2-mut

Attartortut ingerlaavartumik akilersugaqareersut akilersugartik naammassitinnagu nutaamik akilersuinissamut neqeroorfigineqarsinnaanngillat. Attartortoq akilersuinissamut piunasaqaatinik naammassinnissimagaluarpalluunniit tamanna atuutissaaq. Attartortup qaangersinnaanngisaminik akiitsoqalernissaa pinngitsoorniarlugu killiliissutaasoq ilanngunneqarpoq.

3-mut

Attartortut akilersuinissaminnik qinnuteqaannginnerminni kommunimut ikiorserneqarnissamik qinnuteqarnerminni itigartitaasimasussaapput. Qinnuteqaatigineqartoq tassaasinnaavoq pisortanit ikiorsiissutit pillugit Inatsisartut peqqussutaat nr. 15, 20. november 2006-imeersoq immikkulluunniit inatsit alla naapertorlugu ikiorserneqarnissaaq.

Pisortanit ikiorsiissutit pillugit Inatsisartut peqqussutaanni nr. 15-imi, 20. november 2006-imeersumi § 6-imut nassuiaatini ilaatigut imatut allassimasoqarpoq; *"Pisortanit ikiorserneqarnissamut piunasaqaataavoq qinnuteqartup inooqatigiinnermi pisimasumik nalaataqarsimanissaa. Taamaalilluni naammakkunnaarpoq nikerartumik isertitaqarsimanerup aqussinnaasimanginnera.*

Qinnuteqartup atugaanik naliliinnermi pingaaruteqarpoq inooqatigiinnermi pisimasumik nalaataqarsimaneq, qinnuteqartup inuuniarnermi atugarisaatigut allanngortoqarsimanera allannguutaasorlu tunngavigalugu imminut ilaqtaminillu pilersuisinnaajunnaarsimanera.

Aalajangersakkami assersuusiaqarpoq allannguutit nalinginnaasut suusinnaanerini, imaattunik napparsimalersimaneq, ernereermermi sulinnigiffeqarneq, suliffissaaleqineq inooqatigiinnerullu taamaatinneqarnera. Pisariaqavissumik pilertortumik ikiorsiissutit annikinnerpaaffissaminniittuummata, annertusaaniarnissaaq naammangilaq. Imaappoq arlalippassuartigut ataasiakkaat pissutsinik atugaannik naliliisoqartariaqarpoq. Assersuutigalugu pisut najoqqutaralugit pineqaatissinneqarsimasunut inissiisarfimmut inissinneqartup ilaqtai pisortanit ikiorsiissutinik tunineqarsinnaapput. Aamma sulinnermi ajoqusertoqarnerani pisortanit ikiorsiissutinik tunisisoqarsinnaavoq, sulinnermi ajoquserneq napparsimanermik kinguneqartarmat, taannalu § 6-imi ilanngunneqarsimalluni.

Kommunalbestyrelsimit naliligassaavoq qinnuteqartut ataasiakkaat pissutsit nalaataat, taamalu naliligassaalluni qinnuteqartup inuttut inuunerani allannguutit ikiorsiinissamut tunngaviliinersut. Aalajangiisuussaaq qinnuteqartut inooqatigiinnermi nalaatanit patsiseqartumik pilersuinnermut tunngasut

kalluarneqarsimanersut, tamatuma kingunerisaanik qinnuteqartoq imminut ilaqttaminillu pisariaqartitaminnik pilersorsinnaajunnaarlutik.

Aammattaaq piumasqaataavoq qinnuteqartup imminut ilaqttaminillu allatigut pisariaqartinneqartumik pilersuisinnaanera akiligassanillu aalajangersimasunik akilersuisinnaanera pisinnaanngitsoq. Ikiorsiissutit tassaapput allanit namminersortunit pisortanillu pilersorneqarsinnaanermut taartaasut.

Pisarialittut akiligassatullu aalajangersimasutut pineqarput inigisamut, nerisaqarnermut, kiassarnermut, innaallagissamut, atisanut allanullu tunngaviusumik pisariaqartitanut aningaasartuutit. Allanguutit siumut takuneqareersinnaanngitsut allanguutaasussatullu naatsorsuutigisariallit pisortanit ikiorsiissutisinissamut tunngaviliisinnaapput."

Tassalu attartortoq pisortanit ikiorserneqarnissamut qinnuteqaateqarnermini itigartitaasimappat aatsaat akilersuinissamut isumaqatigiissuteqartoqarsinnaasoq piumasqaataavoq. Akilersuinissamut suliap suliarineqarneranut atatillugu attartortup pisortanik ikiorserneqarnissamut itigartitaasimanerminik, soorlu kommunip allakkatigut itigartitsissutaanik uppernarsaasiinissaa attartortitsisup piumasqaatigisinnaavaa.

4)-mut

Attartortut patajaatsumik isertitaqartartut, kisiannili aningaasaatiminnik aningaasartuutininut aalajangersimasunut akiliisarnissamik tunulliuussillutik siunertanut allanut atuisuusut akilersuisinnaatitaanngillat. Attartortoq aningaasaqarnikkut akisussaassuseqanngitsumik pissusilersorsimanersooq imaluunniit nammineq pisuussutigisaminik akilinnngitsuukkaminik akiitsoqalersimanersooq pillugu naliliinermi, attartortuulluurtut allat tamarmik taamatut iliorsimassagaluarnermut iliorsimassanngikkaluarnersulluunniit tunngavigineqassaaq.

Imm. 3-mut nassuiaatini isumaginninnikkut pisartunut tunngavilersuutit arlallit saqqummiunneqarput. Tassani ilaatigut qinnuteqartup napparsimalernini, qitornartaarnini, suliffissaaleqinini, inooqateqarunnaarnini assigisaalluunniit pissutigalugit isumaginninnikkut pisunik eqqorneqarsimasinnaanera taaneqarpoq.

Tassanili apeqqutaasoq pingaarnerpaaq tassaavoq, attartortoq nammineq ilaqttamilu inuuniarnikkut pisariaqartitaminnut aningaasartuutinullu aalajangersimasunut pissaqarsinnaanissaa.

Tassalu attartortoq inuuniarnikkut pisunik nalaataqarsinnaavoq, tamanna pissutigalugu aningaasartuutiminut aalajangersimasunut akiliisinnaajunnaarfinginnisaminik, taakkununngalu ineqarnermut akiliut ilaavoq. Assersuutigalugu attartortup inooqateqarunnaarsimasinnaavoq, attartortup aningaasaqarneranut artukkiinngikkaluartumik. Tassanilu attartortup aningaasaqarnera ajornartorsiorfigineqalersimasinnaavoq, tamatuma peqatigisaanik isumaginninnikkut ikiorserneqartariaqalerfiusumik pisoqanngikkaluartooq.

Attartortoq aningaasaqarnikkut akisussaaffeqanngitsumik pissusilersorsimaguni imaluunniit allatut nammineq pisuussutigisaminik akilinnngitsuukkaminik akiitsoqalersimaguni akilersuisinnaatitaanissamik angusaqarsinnaangilaq.